

弘

簡

錄

弘備錄卷之六十

明刑部員外郎仁和弘齋邵經邦學

皇清翰林院侍講學士四世孫遠平校閱

雜行 唐十二之二 技學

祖孝孫 張文敷 傅仁均

傅奕 崔善爲 夏侯端

李淳風 呂才

袁天綱 子客師張暉裴乙弗弘禮金梁鳳

闕立德 弟立本甄權宋俠許胤宗張文仲

明崇儼 嚴善思

張杲 那和瑛師夜光孫

王珣 李國禎 桑道茂

祖孝孫幽州范陽人齊州長史崇儒之子世以學業知名至孝

孫尤通曉曆算早稱達識隋承六朝亂後鐘律多缺開皇中命

何妥鄭譯蘇夔萬寶常等詳討不定至平江左得陳樂官蔡子

元于普明等始置清商署太常卿牛弘引孝孫爲協律郎與子

元普則叅定雅樂。又得陳陽山太守毛爽妙知京房律法。布瑄飛灰順月皆驗。爽時年老弘恐失其傳。奏令孝孫往從得爽律法。以一律生五音。十二律而爲六十音。因而六之。爲三百六十三音。以當一歲之日。又祖述洗重依淮南本數。用京房舊術求之。得三百六十律。各因其月律而爲一部。以律數爲母。以一中氣所有日爲子。以母命子。隨所多少。分直一歲。以配七音。起于冬至。以黃鐘爲宮。太簇爲商。林鐘爲徵。南宮爲羽。姑洗爲角。應鐘爲變宮。蕤賓爲變徵。其餘日建律皆依運行。每日各以本律爲宮。旋宮之義。由斯著矣。時弘方定樂。難復更改。至大業時。採晉宋舊樂。惟奏皇夏等十有四曲。旋宮之法。亦不施用。高祖受禪。擢孝孫爲著作郎。歷吏部郎中。太常少卿。漸見親委。帝雅意禮樂。雖時有論奏。以軍國多務。未遑改創。樂府尚用隋氏舊文武。

德七年始命與竇璉等修定雅樂。又以陳梁舊樂雜用吳楚之音。周齊舊樂多涉蕞戎之伎。於是斟酌南北。考定古音。作大唐雅樂。以十二月各順其律。旋相爲宮。制十二樂。合三十二冊。八十四調。事具樂志。旋宮之義亡絕已久。世莫能知。自孝孫始復。卒後協律郎張文收復採三禮增損樂章。然皆因其本音。文收附內史舍人虔威子宰相文瓘從弟善音律。嘗覽蕭吉樂譜。以爲未詳。更博採羣言。及歷代公華。裁竹爲十二律。吹之備旋宮之義。太宗召爲太常令。著新樂書十二卷。時有古鐘十二。近代惟用其七。餘五莫能通。文收吹律調之。聲皆響徹。人服其妙。貞觀十四年。景雲見黃河清。令制景雲河清曲。名爲燕樂。奏之。管絃今元會第一奏者是也。咸亨元年。遷太子。率更令卒。

傅仁均滑州白馬人。善曆算推步之術。武德初。因太史令庾儉

丞傅奕薦高祖召令改修舊曆仁均上表陳七事其一漢洛下閔以太初元年歲在丁丑創曆起元今大府以戊寅年受命甲子日登極所造之曆以三元之法一百八十去其積歲武德元年戊寅爲上元之首則合璧連珠懸合於今日其二堯典日短星昴以正仲冬前代造曆莫能允合臣合創法五十餘年冬至輒差一度却檢周漢千載無違其三毛詩十月之交朔日辛卯臣今推得周幽王六年辛卯朔正當蝕並皆符合其四春秋命曆序云魯僖公五年壬子朔旦冬至諸曆莫能符合臣今造曆推與相同自斯以降並無差爽其五古曆日蝕或在於晦或在二日月蝕或在望前或在望後臣今立法月有三大三小則日蝕常在於朔月蝕在望前却驗魯史並無違爽其六前代造曆命辰不從子半命度不起虛中臣今命辰起于半度起於虛六

度命合辰得中於子符陰陽之始會曆術之宜其七前代諸曆  
月行或有晦猶東見朔以西眺臣今以遲疾定朔永無此病經  
數月曆成奏上號曰戊寅元曆上覽之稱善詔於元年七月始  
頒行天下授仁均員外散騎常侍賜物二百段至太史令後封  
德彝奏曆術差謬勅祖孝孫考其得失太史丞王孝通執甲辰  
曆法以駁之案孔氏註曰短星昴以正仲冬云七宿畢見舉中  
者言耳是知中星無定故互舉一分兩至之星以爲成驗昴西  
方處中之宿虛爲北方居中之星一分各舉中者卽餘六星可  
知若乃仲冬舉烏仲夏舉火此一至一分又舉七星之體其餘  
二方可見今仁均專守昴中而爲定朔執文害意又案月令仲  
冬昏在東壁明知昴中則非常準若言陶唐之代定是昴中後  
代漸差遂至東壁則堯前七千餘載冬至之日卽合翼中日應

在井十有三度夫井極北去人最近而斗極南去人最遠在井則大熱在斗乃大寒然堯前冬至卽應翻熱及於夏至便應反寒四時倒錯寒暑易位以理推尋必不然矣又鄭康成對弟子孫皓云日永星火只是大火之次三十度有其中者非謂心之火星實正中也又平朔定朔舊有二家平望定望由來兩術然三大三小是定朔定望之法一大一小是平朔平望之義且日月之行有遲有疾每月一相及謂之合會故晦朔無定由人消息若定大小合朔者合會雖定而節元紀首三端並失若上合履端之始下得歸餘於終合會時有進退履端又皆允協則甲辰元曆爲通術矣仁均對曰宋代祖沖之久立差術至隋張胃玄等同修雖差度不同各明其意今孝通不達宿度之差移未曉黃道之遷改乃執南斗爲冬至之恆星東井爲夏至之常宿

率意生難豈爲通理夫太陽行於宿度如郵傳之過逆旅宿度  
每歲卽差黃道隨而變易豈得以膠柱之說而爲幹運之難乎  
又案易云治曆明時禮云天子立端聽朔於南門之外尚書云  
正月上日受終于文祖上日朔日也又季秋月朔辰不集于房  
集合也不合則日蝕隨可知矣又云先時不及時皆殺無赦先  
時謂朔日不及時也若有先後之差是不知定朔之道矣詩云  
十月之交朔日辛卯春秋日蝕三十有五左丘明云不書朔官  
失之也明聖人之教不論於晦惟取朔耳自春秋以後去聖久  
遠曆術差違莫能詳正故秦漢以來多非朔蝕而宋代何承天  
微欲見意不能詳究乃爲太史令錢樂之散騎侍郎皮延宗所  
抑止孝通今語乃是延宗舊辭今略申明梗槩夫理曆之本必  
推上元之歲日月如合璧五星如連珠夜半甲子朔旦冬至自

此以後既行度不同七曜分散不知何年更得餘分普盡還復  
總會惟曰分氣分得有可盡之理因其得盡卽有三端之元故  
造經立法者小餘盡卽爲元首此乃紀其日數之元不關合璧  
之事時人不達其意皆云大小餘俱盡卽定夜半甲子朔旦冬  
至不知冬至自有常數朔名由於月起既月行遲疾無常三端  
豈得卽合必須日月相合與冬至同日者始可得名爲合朔冬  
至耳今法惟取上元連珠合璧夜半甲子朔旦冬至合朔之始  
以定一九相因行至於日常取定期之宜不論三端之事皮  
延宗本來不知何承天亦自未悟何得引而相難耶孝孫以仁  
均之言爲然貞觀初有益州人陰弘道又執孝通舊說以駁之  
終不能屈李淳風又駁其十八事勅崔善爲考定七條改從淳  
風餘一十一條並依舊定

傳奕相州鄴人素曉天文曆數仕隋爲儀曹掾漢王諒嘗蓄異志因問奕或入井主何災祥以直對曰東井黃道所由災歎次舍不足爲怪若入地上井乃爲災諒怒後敗以所對不阿免死徙扶風高祖時爲太守禮之及卽位拜太史丞庾儉父質嘗因占候忤煬帝懼死而薦奕自代遂爲令素性率直數排毀儉以仁厚不爲之恨所奏天文密狀屢會上旨定置參旗井鉞等十二軍之號武德三年進漏刻新法頒行之又以國制多仍隋舊上言龍紀火官皇帝廢之咸池六英堯不相訟禹弗行舜政周弗襲湯禮易稱巳日乃乎皆言革也其義大矣哉隋季違天害民專峻刑法殺戮賢俊天下兆庶同心叛之陛下撥亂反正安可不新民之耳目願改正朔易服色變律令革官名功極作樂治終制禮使民知盛德之隆此其時也然官貴簡約夏后官百

不如虞氏五十。周三百。不如商之百。又言夏有亂政而作禹刑。商有亂政而作湯刑。周有亂政而作九刑。衛鞅爲秦制法。增鑿顛抽脅。鑊烹等六篇。始皇爲挾書律。此失於煩。不可不監。復上疏極詆浮圖法。以爲西域無君臣父子。以三塗六道。嚇愚欺庸。追既往之罪。窺將來之福。至有身陷惡逆。獄中禮佛。口誦梵言。以圖偷免。且生死壽夭。本諸自然。刑德福繁之人。主。今其徒矯託皆云。由佛攘天理。竊主權。五帝三王。未有其法。君明臣忠。年祚長久。至漢明帝。始立佛祠。然惟使桑門自傳其教。西晉以上。妄求功德。尙有嚴科。至石苻之世。其禁始除。主庸臣佞。政虐祚短。事佛致然。梁武齊襄。尤足爲戒。今僧尼十萬。刻繪泥像。以惑天下。若配合其衆。十年之後。滋產必多。加之教訓。兵農兩足。利可勝既耶。又上一二論言益痛切。帝下其議。羣臣惟張道源。

稱爲合理。蕭瑀大以爲非。至曰：佛聖人也。非聖人者。無法請誅之。奕駁以非孝者。無親瑀不能答。但合掌曰：地獄之設。正爲斯人。會將傳位。未及行而止。先是奕奏。太白躡秦分。秦王常有天下。太宗旣立。卽召賜食。語以向所奏。幾敗我事。自今以後。毋有所諱。而不盡言。又嘗問卿拒佛法。奈何。奕曰：佛始自逃父出家。抗逆君命。欺誅西域。以自神。迷惑滋廣。而蠱兒幻夫效之。以繼慳悖所親。以游手逃租稅。有害國家。無補百姓。帝頗然之。生平雖善數術。然嘗訓子。六經名言。可習已學。不可以傳。疾病未嘗問醫。自書誌曰：傳奕。青山白雲人也。以醉而卒。年八十五。誠令保葬。識者以爲縱速。有所注老子音義。并集晉魏以來駁佛議者爲高識傳十卷。行于世。

崔善爲。貝州武城人。祖顓。魏散騎侍郎。父權。會齊丞相。府參軍。

善爲幼好學兼善天文算曆明達時務仕隋調文林郎督工徒五百營仁壽宮總監楊素索簿閱實善爲暗唱其名無一差謬素驚自是四方有疑獄悉令按訊皆究其情仁壽中遷樓煩郡司戶書佐唐公時爲太守尤禮接之見隋政日紊密獻大計及兵起署大將軍府司戶參軍封清河縣公俄進內史舍人尚書左丞諸曹令史畏其明察欲阻罷所任以身短而僂飛語嘲之帝聞怒曰昔齊末姦史歌斛律明月高緯闇不察至滅其家因下令購謗者乃止李淳風詆傅仁均戊寅曆疎略帝令考二家得失多所裁正建言天下已定羣臣不宜奪服始詔終喪貞觀初爲陝州刺史時畿戶徭地狹者徙寬鄉善爲奏畿內戶衆而丁壯若聽徙皆在關東虛近實遠非經過之議其事乃止後歷大理司農二卿坐與同僚不平出爲秦州刺史卒贈刑部尚書

諡曰忠

夏侯端壽春人梁僕射詳之孫仕隋爲大理司直與唐公相友善大業中唐公討賊河東表以爲副達于數術見玄象玉牀動搖帝座不安密語盡墟得歲真人將興安天下之亂者其在公乎但上性猜忌內惡諸李金才已誅次且及公宜早爲計唐公感其言義師興吏由河東捕送長安入京命釋其囚引至臥內擢祕書監會李密降關東地未有所屬端請假節招諭拜爲大將軍河南道招慰使傳檄州縣東薄海南捷淮二十餘州遣使順附次譙州會亳州已降王世充道路隔絕資糧窮盡麾下二千人素得其心不忍委去餓死凡十三四又數遇賊存者纔三十餘人相與東走擲豆昔勞野豆也以食持節臥起世充遣人招之授以淮南郡公吏部尚書印綬并應用服飾端悉焚之懷節

旄間道走宜陽歷崖峭榛莽比到入謁體髮焦瘁人不堪視初不自言惟謝無功帝憫之不改舊官出爲梓州刺史貞觀初卒李淳風岐州雍縣人其先自太原徙父播隋高唐尉頗有文學以秩卑不得志棄官號黃冠子注老子撰方志圖并文集十卷行於代淳風幼爽博涉羣書尤明天文曆算陰陽之學貞觀初授將仕郎直太史局上言今靈臺候儀是魏代遺範觀其制度疎漏實多自上古唐虞以泥天儀考七曜之盈縮則官大司徒以土圭正日景暨于周末其器遂亡漢武帝復命洛下閎更造事多疎闕故賈逵張衡各有營鑄陸績王蕃遞加修補或綴附經星機應漏水或孤張規郭不依日行推驗七曜並循赤道今驗冬至極南夏至極北而赤道當定於中全無南北之異以之推測豈得其真黃道渾儀之闕至今千餘載矣太宗因令改

造至貞觀七年成其制以銅爲之表裏三重下據準基狀如十字末樹鬣足以張四表第一名六合儀有天經雙規渾緯規金常規相結於四極之內備二十八宿十干十二辰經緯三百六十五度第二名三辰儀圓徑八尺有璿璣規道月遊天宿矩度七曜所行並備于此轉於六合之內第三名四遊儀玄樞爲軸以連結五衡遊筭而貫約規矩又玄樞北樹北辰南距地軸旁轉於內其玉衡在玄樞之間南北遊仰以觀天之辰宿俯以識器之晷度時稱其妙命置於凝暉閣著書七卷論前代渾儀得失之差名爲法象志奏日上稱善加授承務郎十五年除太常博士尋轉太史丞預修晉書五代史文思博要其天文律曆五行志皆所作也二十二年遷太史令太宗嘗聞祕記唐三世後女主武王代有天下密名淳風以訪其事對曰臣據象推算朕

兆已成其人見在內宮爲眷屬不越三十年當據尊位易姓受代殺唐子孫殆盡帝問疑似者盡除之如何答曰天之所命難於祓避且王者不死或枉及無辜距今更三十年亦當衰老剛變爲慈庶幾陛下子孫不至甚損今若殺之當更復生少壯嚴毒以後子孫必無遺類矣上善其言而止其占候吉凶合若符契當時術者疑其別有役使不因學習所致然竟不能測之願慶元年以修史功封樂昌縣男又因太史監候王思辨先奏五曹子孫十部算經理多舛駁詔與算學博士梁述太學助教王貞儒等注解刊正立於學官龍朔二年改授秘閣郎中時戊寅曆法漸差又令增損劉焯皇極曆改撰麟德曆奏之術家稱其精密咸亨初年六十九卒所撰典章文物志乙巳占秘閣錄并演齊民要術等凡十餘部傳於代子諺孫仙宗並爲太史令

呂才博州清平人少好學善陰陽方技之書及長著述甚多貞觀時祖孝孫增損樂律與明音律人王長通白明達更相質難不能決太宗詔侍臣更舉善音者溫彥博奏才天悟絕人凡未聞見一接輒究其妙王珪魏徵又稱才所製凡七十二枚長短不同然皆與律諧契卽名直弘文館參論樂事帝嘗覽周武帝三局象經不能通其旨才尋釋一宿脫然通解具圖以聞蔡允恭少通其略與才正同由是知名擢累太常博士帝嘗病陰陽家所傳書多謬僞淺惡世益拘畏命與宿學老師刪落煩詭經可用者爲五十三篇合舊書四十七頒行天下其所持議儒而不俚以經誼推驗諸術家共訶短之今略列其卜宅篇曰近世五姓謂宮商角徵羽以爲天下萬物悉配屬之以處吉凶然言皆不類如張王爲商武庚爲羽是以音相附至柳爲宮起爲

角則又不然其間一姓而兩屬復姓數字不得所歸是直野人  
巫師說爾按堪輿經黃帝對天老始言五姓其時獨姬姜數百  
而已以後賜族寔多然管蔡邲霍魯衛毛聃郤雍曹滕畢原鄩  
郇悉本姬姓孔殷宋華向蕭亳皇甫悉本子姓至因官命氏因  
邑賜族本同末異詎爲配宮商哉春秋以陳衛秦爲水姓齊鄭  
宋爲火姓各以所出之祖所分之星所居之地以著由來非宮  
同角徵羽相管攝也祿命篇曰祿命之說雖云尚矣推原本始  
固不其然積善餘慶豈建祿而後吉積惡餘殃匪劫殺而後災  
天命勦絕乃因多罪妖星退舍本於修德學也祿在其中不謂  
生當建學文王憂勤損壽非關月值空亡長平坑卒豈必俱犯  
三刑南陽近親未便俱當六合歷陽成湖不共河魁蜀郡火災  
不盡災厄世有同建與祿而貴賤殊域共命若胎而天壽異科

魯莊公以六年七月生按曆歲在乙亥月建申值祿空亡又觸  
勾絞六害驛馬三刑據法窮賤無官又命火也生當病鄉法曰  
爲人尪弱而詩言頌長美日惟向命一法當壽而公薨止四十  
五一不驗也始皇生於正月故名政是歲壬寅正月命背祿於  
法無官假得祿奴婢應少又犯驛馬三刑法望官不到命金也  
正月爲絕無始有終而二世遂絕獨建命生法當壽帝崩不過  
五十二不驗也漢武帝以乙酉歲七月七日平旦生當祿空亡  
雖向驛馬乃隔四辰法少無官老而吉而帝卽位年十六末年  
空耗三不驗也後魏高祖孝文皇帝生皇興元年八月是歲丁  
未爲背祿命與驛馬三刑身剋於法無官又生不見父而孝文  
受其父顯祖之禪率天下以事其親四不驗也宋高祖癸亥三  
月生祿與命皆空亡又生子墓中法宜嫡子雖有次子當早卒

而高祖長子先被殺次子義隆享國又生祖祿下法得嫡孫其  
孫劬濟皆篡逆幾失宗祧五不驗也葬篇曰後代葬說出于巫  
史一物有失便謂災及死生多爲妨禁以售其術附妄馮妖至  
其書乃有百二十家春秋王者七月而葬諸侯五月而葬大夫  
三月士庶人踰月而已貴賤不同禮亦異數故先期而葬謂之  
不懷後期不葬謂之殆禮此則葬有定期不擇年與月一驗也  
又丁巳葬定公雨不克葬至于戊午襄事禮卜先遠日者自未  
而進以避不懷今法巳亥日用葬最凶春秋是日葬者二十餘  
族此葬不擇日二驗也又禮周尚赤大事用旦殷尚白大事用  
中夏尚黑大事用昏大事卽喪禮也比直取當代所尚不擇時  
早晚三驗也鄭子產及子太叔葬簡公時司墓大夫室當柩路  
若壞其室卽平旦而塋不壞其室卽日中而塋子產不欲壞室

欲待日中子太叔曰若日中而棚恐久勞諸侯大夫來會葬者此不問時之得失惟論人事可否而已曾子曰葬逢日蝕舍於路左待明而行所以備非常也今法多取乾艮二時乃近夜半文典禮乖此葬不擇時三驗也若謂爵祿富貴葬可以致修短蕃縮葬可以招則滅孫有後未聞葬得其吉若救絕嗣匪云兆得其凶矧葬者並在國都之北趙氏乃在九原漢山陵或散處諸域又何上利下利大墓小墓爲哉然劉之子孫支庶不絕趙後與六國等王此又不可信用五姓之驗也且人有初賤而後貴始泰而終否彼子文展禽冢墓已定名位不常故知榮辱升降事關諸人而不由於葬世之人但爲巫師所欺忘擗踊荼毒以期徵倖於是相坐隴希官爵擇日時規財利謂辰日不哭欣然而受弔謂同屬不得臨壙吉服避送其親詭教禮俗不可以

法其說如此又令造方域圖及教飛騎戰陳圖屢稱旨擢太常丞永徽中預修文思博要及姓氏錄高宗以琴曲古有白雪近代額絕令太常增修乃取御製雪詩爲歌詞而用無忌志寧敬宗等和詩爲送聲合十六節並皆合韻上大悅更作白雪歌詞十六首付編樂府又同修本草麟德中轉太子司更大夫卒子方毅七歲能誦經太宗聞其敏召見奇之賜束帛長爲右衛鎧曹參軍以母喪哀毀而卒世共哀之

袁天綱成都人幼精相術仕隋爲鹽官令大業中至洛陽與杜淹王珪韋挺游視淹蘭臺成就學堂寬博必爲糾察官以文藻見知珪三停成就天地相臨十年以來官五品要職挺面頰大獸交友極誠當以武顯必獲攜接然久皆得譴又見竇軌曰君伏犀貫玉枕輔角完起十年間必於梁益間顯立功名然赤脈

千臆方語氣浮入于大宅若爲將必多殺願自戒後其言皆驗  
武德中俱坐事流徙復見天綱語曰公等終且貴位皆三品杜  
難與言壽王韋後於杜而壽過之但晚節皆困軌右輔澤而動  
不久必還復如其言貞觀初太宗召見曰古有君平朕喜得爾  
對曰彼不逢時臣固勝之武后幼時見其母曰在法當生貴子  
復見二子元慶元爽曰官三品保家主也見韓國夫人曰貴而  
不利夫最後姆抱后給以爲男驚曰龍瞳鳳頸至尊之相若女  
更奇貴不可測帝令視岑文本曰學堂瑩夷相覆過目文章振  
天下首生骨未成若是三品恐非壽兆見馬劄曰伏犀貫腦背  
若負重近古君臣相遇未有及公者然面澤赤而耳無根後骨  
不隆壽恐不長張行成得官雖晚終位宰相其術精有如此已  
方任火山令高士廉問終作何官謝曰僕及夏四月數已盡如

期而卒子客師爲廩犧令亦傳其術高宗置一鼠于匱令術家射皆曰鼠也客師曰雖然入時祗一出則有四發之果生三子嘗渡江喚舟卽返左右請故答曰吾見其人鼻下氣皆墨不可以濟俄有一男子跛而負直就舟仍還曰貴人在則無事矣後乃知婁師德也時有許州長社人張憬藏技與天綱埒蔣儼來問答曰公盡六年而貴厄在三尺土下後果使高麗囚居土室六年還爲蒲州刺史劉仁軌徵時與鄉人靖思賢請占答曰公當五品雖獲譴終冠人臣謂賢法應客死而孤言旣應賢有三子後皆喪盡鬻田宅寄死友家魏元忠往見久不答怒曰窮通有命何預君耶拂衣起遽留之曰君相乃在怒時位必卿相姚崇李迥秀杜景佺與之游許以皆至宰相然姚最貴郎中裴珪妻趙氏見之驚曰豕視淫且有四白五夫守宅俄犯姦沒入

掖廷裴光庭當國憬藏以紙大背白字投之光庭曰吾旣爲台  
司復何言後貶台州刺史 隋末又有高唐人乙弗弘禮當煬  
帝居藩名見質曰大王爲萬乘主所戒在德及卽位悉詔諸術  
家置坊以處之使弘禮總攝帝見海內安亂問曰而昔言旣驗  
終當奈何弘禮逡巡不對帝怒曰不言且死答曰聖人不相故  
臣不能知臣觀人臣相與陛下類者不長帝令有司監視毋得  
與外語薛大鼎坐事沒於奴及貞觀時請改衣視指屢而下曰  
位方岳 天寶末有金梁鳳者善觀玄象客河西見權武威節  
度留後裴冕言天象有變不半歲當兵起向洛陽又向蜀又向  
朔方君此時當以御史中丞除宰相冕以爲妖絕之祿山果反  
哥舒翰奏冕爲中丞追赴京又言洛陽卽滅蜀亦不久朔方曰  
愈明後勸肅宗卽位冕遂爲相因薦于帝拜都水使者又謂判

官呂誼君骨相合輔政須一大驚乃得俄榜驛吏突入射誼矢  
幾中走而免明年入相後在鳳翔李揆盧允毀服紿謁自稱選  
人語李曰公一年內卽入相盧不過郎官揆思其言擢允吏部  
郎中其應驗多類此後佯聾以自晦冕鎮成都與同行病卒  
聞立德名讓以字行其先由馬邑徙京兆萬年父毘以工藝知  
名爲隋殿內少監二子立德立本早傳家業皆機巧有思立德  
武德初爲秦王府士曹參軍從平東都遷尚衣奉御制袞冕大  
裘等六服屨輿傘扇咸有典法當世稱之貞觀初歷將作少匠  
封大安縣男護治獻陵拜大匠文德皇后崩令攝司空營昭陵  
坐弛職免起爲博州刺史卽洪州造浮海大航五百艘從征遼  
攝殿中監規築土山破安市城師還至遼澤東西亘二百里淖  
不可通爲塹道築橋兵無留行帝悅賜予良厚又營翠微玉華

二宮罷工部尚書帝崩復攝司空營山陵畢以勞進爵縣公永徽五年高宗幸萬年宮命留守京師領徒四萬治京城卒贈吏部尚書并州都督陪葬昭陵諡曰康子玄遠官至司農少卿孫知微聖曆初爲右豹韜衛將軍與右武衛郎將楊鸞莊資金幣送武延秀至突厥和親潛約突厥留延秀進寇媯檀等州事敗伏誅立本善於圖畫尤工寫真命圖十八學士及陵煙功臣貌像咸臻其妙位主爵郎中上嘗與侍臣泛舟春苑見異鳥集池中容與波上悅之令在坐咸賦詩而名立本伴寫其狀乃俯伏池左研吮丹粉瞻望坐者羞汗歸戒其子曰吾少讀書文辭不減儕輩今獨以書見名與廝役等若曹慎毋習此願處中累遷將作大匠代兄爲工部尚書總章元年以司平太常伯拜右相賜爵博陵縣男與姜恪對掌機密有應務材然無宰相器咸

亨初復官名改爲中書令卒諡文貞

甄權許州扶溝人以母病與弟立言究習方書並爲高醫仕隋

爲秘書正字稱疾免魯州刺史屢秋嶽風痺不能挽弓使較矢

嚮朔立鍼其肩隅一穴卽復能射其療病多此類貞觀中年百

三歲太宗幸其舍視飲食訪逮其術擢朝散大夫賜几杖衣服

尋卒所撰脈經針方明堂人形圖各一卷立言武德初爲太常

丞有所撰本草音義七卷古今錄驗方五十卷杜淹苦流腫帝

遣視還奏去此十日午漏上且死如其言有尼心腹懣煩彌二

歲診曰有蠱誤食髮所致令餌雄黃一劑吐蛇如拇無目燒之

有髮氣乃愈後又有涪州清潭人宋俠官朝散大夫藥藏監

撰經心錄十卷義興人許胤宗仕陳爲新蔡王外兵參軍王

太后病風脈沈口噤醫家告術窮卽煮黃耆防風湯數十斛置

牀下薰氣如霧游之是夕得語撮爲義興太守陳下入隋歷尚  
藥奉御武德初累進散騎侍郎關中多骨蒸疾轉相傳染皆死  
使療視之必愈武勣著書以貽後世答曰醫特意耳思慮梅臍  
得之脈之候幽而難明吾意所解口莫能宣古之上醫要在視  
脈識病若病與藥值惟須一味攻之氣純而速今人不善爲脈  
以情度病多其藥物警獵不知兔廣終原野冀以獲之術亦疏  
矣縱藥偶得他味相制力亦弗專此難愈之驗也脈之妙處既  
不得傳虛著經方無益於世此吾所以不著書也其言今古不  
易卒年九十餘 又武后時有洛陽人張文仲李虔縱京兆人  
韋慈藏皆任尚藥奉御論風與氣尤精嘗言風狀瓦二十四氣  
狀八十大體醫藥雖同人性各異庸醫不達藥性使冬夏失節  
因此殺人惟頭風與上氣足氣藥可常餌自餘須發則治以脈

消息但有風病之人春末夏初及秋暮可使洞利卽不困劇乃著四時輕重術凡十八種上之特進蘓良嗣方朝疾作仕廷中診曰此因憂憤邪氣激也若脅痛殆未可救及心則殆果死後虔縱官御醫慈藏至光祿卿

明崇儼洛州偃師人其先平原士族世仕江左五代祖山賓梁國子祭酒父恪豫州刺史初令安喜有小吏能役名鬼神崇儼盡傳其術乾封初應岳牧舉調黃安丞以技術自神會刺史有女病篤療之而愈高宗聞其名名見甚悅擢翼王府文學試爲宿室使宮人奏樂其中名問何祥爲我止之崇儼書桃木爲二符剝室上寂然不聞問以故宮人答曰向見怪龍甚怖而止盛夏帝思雪崇儼坐頃云往陰山遂取以進四月帝又憶瓜卽索百錢須臾以獻曰得之緱氏老人圃中帝召老人問云埋一瓜

土中失之得百錢儀鳳中累遷正諫大夫入閣供奉每謁見多  
陳時政咸託鬼神爲言帝輒允納爲其祖御製碑文立於潤州  
故宅之樓震寺後爲武后作厭勝事因言章懷太子不堪負荷  
太子使盜刺於東都贈侍中諡曰莊樞子珪爲秘書郎開元中  
至懷州刺史

嚴善思名譔以字行同州朝邑人父延徐州長史與河東裴玄  
證隴西李貞蔡靜皆通儒術該曉天文圖讖曆數卜相之術善  
思傳其業褚遂良上官儀等皆奇之高宗封泰山舉銷聲幽數  
科擢第調襄陽尉居親喪廬墓家居十年武后擢監察御史兼  
右拾遺內供奉數言天下事方酷吏構大獄拜爲詳審使平活  
八百餘人原宥千餘姓長壽中按囚司刑寺罷疑不實者百人  
中書舍人劉允濟且死力訟其寃得免後見允濟未嘗及之尚

書王本立許以今之祁奚來俊臣等惡之誣譏交趾五歲得寤時李淳風死侯家皆不效詔以著作佐郎兼太史令聖曆二年災惑入輿鬼后問其占曰商姓大臣當之是年王及善卒長安中災惑入月鎮星犯天關法當亂臣伏罪有下謀上之象二張果誅其占驗多此類神龍中遷給事中后崩將合葬乾陵建言尊者先葬卑者不得入今啓乾陵是以卑動尊術家所忌神道貴靜多所驚駭矧曩營乾陵國有大難易姓二十餘年方始稍定今又營之難將復生且合葬非古漢世皇后別起陵墓積祀四百魏晉始合葬祚率不長今若更擇吉地附近乾陵取從葬之義使神有知無所不通若其無知合亦何益山川精氣上爲列星葬得其所則神安而後嗣昌失其宜則神危而後嗣損願割私愛使社稷長久中宗不納后喪公除太常請大習樂帝未

許善思奏禮陰也樂陽也三年不爲禮必壞三年不爲樂必崩樂崩陽伏禮廢陰愆故漢魏以來以日易月變以適時孝道之大請如太常奏帝從之景龍中遷禮部侍郎懼后專政爲社稷憂求爲汝州刺史臨行密語姚崇韋氏禍且塗地相王所居有華蓋紫氣必位九五公善護之及睿宗立崇奏其事名拜右散騎常侍唐隆元年譙王重福僞除禮部尚書敗日論死給事中韓思復固解得流靜州思復亦不自言時以爲長者之報開元十六年遇赦還卒子向乾元中爲鳳翔尹寶應中授太常卿三世皆年八十五向兄宙年九十五終趙郡司馬

張果者世傳數百歲人其術變化莫測武后時隱中條山常遊汾晉晦其鄉里世系以自神后遣使召之佯死不赴後復見恆州山中開元二十一年刺史韋濟以聞玄宗令通事舍人裴晤

往迎見輒氣絕而仆良久漸蘇晤不敢逼馳白其狀更遣中書舍人徐嶠齎璽書致禮邀請始至東都舍集賢院位侍中肩輿入宮帝親問治道神僊事語祕不傳素善氣息貌若六七十歲人能累日不食數御美酒自言生堯丙子歲時有邢和璞者善算人壽數帝使推其甲子惛然莫知又有師夜光善視鬼帝名果對面終莫能見時天寒帝密語高力士朕聞飲薑汁無苦真仙人也因取以飲果三進頹然如醉顧曰非佳酒也頃視齒焦縮顧左右取鐵如意擊盧之藏于帶中更出藥傳其斷良久已生粲然駢潔帝益神之以玉貞公主早歲好道欲降爲妻而未言果怒謂秘書少監王迥質太常少卿蕭華曰諺云娑羅得公主平地生公府可喜也頃之使至傳詔言其事果大笑固不奉詔二人始悟向來之言後懇辭還山有詔圖形集賢院覆銀青

光祿大夫賜號通玄先生賜帛三百匹給扶持二人至恆山蒲  
吾縣不知所之或言尸解帝於其所立樓霞觀改蒲吾爲平山  
縣 夜光者薊州人少爲浮屠至長安因九仙公主得名見溫  
泉帝奇其辯投四門博士賜冠帶緋衣銀魚金繒千數得侍左  
右如幸臣和璞喜黃老作潁陽書世傳之 又有孫旣生者能  
使石自鬪草爲馬人騎馳走楊貴妃喜觀之數名入宮又有羅  
思遠能自隱帝厚賜金帛願學之不肯盡術試自隱常餘衣帶  
及思遠共試則驗帝怒裹以幘歷殺之數日有叶使自西還逢  
之于路笑而言上爲戲謔何至如此 又有杜生者許州人善  
易占有問亡奴欲追語以自北行逢乘馬者懇丐其鞭其人果  
值如生語怒曰去鞭吾何以進馬令折道傍變代之甫往折見  
亡奴伏其下獲之他日又有問者令持錢伺於道見進錫者可

市其一必得奴俄而使至售得其鷄忽飛集灌莽上往取之得  
亡奴衆以爲神 又黃州僧泓者善葬法每行視山原卽爲之  
圖與天官侍郎張敬之善時武后在位常指所服示子冠宗曰  
莽朝服耳俄敬之應入三品泓忽言君無煩求莽朝服敬之大  
驚其弟訥之疾殆泓曰公弟當爲三品不足憂已而果愈又爲  
燕國公張說市宅戒曰無穿東北旺隅他日復見曰宅氣索然  
云何與說共視已穿三坎各丈餘驚曰公富貴一世而已諸子  
將不令終說懼將平之曰客土無氣與地脈不連譬身患瘡疔  
補他肉無益也後說子皆汗賊死斥

王璵方慶六世孫少爲禮家學博求祠祭儀注以干時好玄宗  
在位久推崇老子好神仙事廣修祠祭璵上言請築壇東郊祀  
青帝上納之擢太常博士至侍御史仍充祠祭使過承恩遇有

所履被率類世俗巫覡以紙寓錢爲鬼事焚以祈福肅宗立累遷太常卿亦以祠禱見寵多獲賞賚乾元中歷蒲同絳等州節度使俄代崔圓爲中書侍郎同平章事舉望素輕無他長才不爲士譏諧可驟聞得政中外悵駭奏帝於南郊東置太一壇勸以身見九宮祠帝意旣專他不能奪又嘗不豫太卜言祟在山川輿遣女巫盛服乘傳中人護領分禱天下名山大川所至于託州縣賂遺狼籍內一巫美而蠱尤檢伎不法隨以惡少數十馳入黃州刺史左震晨至館請事門竊不啓震怒使錡入斬巫延下悉誅所從少年籍其賊十餘萬併中人逃還以聞歲餘罷爲刑部尚書上元二年出爲淮南節度徙浙東觀察皆兼祠祭使名入爲太子少保轉少師卒贈開府儀同三司諡曰簡懷自

此左道術士紛紛出焉李國禎者廣德初建言唐家仙系宜

崇表福區招致神靈請度招應南山作天華上宮露臺大地婆  
父祠并三皇道君太古天皇中古伏羲女媧等各爲堂皇給百  
戶掃除又卽義扶谷故湫祠龍置房宇詔並從之方歲饑除地  
課工人不堪命昭應令梁鎮慷慨名士也上疏切諫言七不可  
臣聞天神地祇其尊無對雖掃地可祭惟精意可享未聞廢先  
王之典爲人所福者今福未至而人已困况又違神虐人何從  
而致禍邪宗廟一月尚無三祭此實不宜矧婆父鄙語不見經  
傳若爲地建祖廟上天必貽向背之責其湫者龍所託耳今湫  
竭已久龍安所存至三皇五帝道君等兩京及所都各有宮廟  
春秋彝饗此復營造是謂瀆神且休咎豐凶本於五事不在山  
川百神明甚國禎等特以營罔天聽負抱粢糈無時休息臣昨  
受命有所安輯陛下許以權宜今所興造人神胥怨災孽並至

臣。謹。以。便。宜。悉。停。帝。從。之。後。仕。至。司。門。郎。中。

桑道茂善太一遁甲五行災異之說言無不應乾元初官軍圍安慶緒於相州勢危甚道茂在圍中密語人曰三月壬申西師潰至期九節度兵皆敗代宗聞之召待詔翰林建中初言國家不出三年當有厄而奉天有王氣宜高垣堞可容萬衆為王者之居德宗詔京尹嚴郢發衆數千及神策兵城之時盛夏趣功人莫知其故及朱泚反帝蒙難賴奉天以濟李晟方為右金吾將軍忽懷一書具姓名見晟曰公貴盛無比我命在公手願見赦晟大驚不領其言因出書請晟判晟笑曰欲我何語道茂言第書準狀赦之晟勉從再拜而去後果汗朱泚僞官晟收長安與逆徒俱縛旗下將就刑出書以示晟奏原其死時藩鎮擅地無寧道茂曰年號元和寇盜翦滅果然所居有二柏甚茂言人

居而木著者當去蓋木盛則土衰上衰則人病乃埋鐵數十斤於其下後有發者必死太和中溫造居之果發藏鐵而死盧杞嫉杜佑與楊炎善佑懼以問答曰君歲中利外則福壽問涯俄拜饒州刺史後至司徒問李泌病曰三月二日就喪國家有急泌身危果因中和節德宗強泌入見不能步詔歸第卒是日北軍謀亂仗士禽斬之又語李石父鵬君位止此而冢息位宰相次福亦大鎮子孫百世屬卒後其言皆應帝試信以爲神死之日屢遣使祭

冊曰古稱技顯必有可觀星占醫律世守其官充之以學悟之以天前知不惑孰不其然嗟彼小道希世長年詭行怪誕斯乃可憐速于末世百一無傳

弘簡錄卷六十一

明刑部員外郎仁和弘齋邵經邦學

皇清翰林院侍講學士四世孫遠平校閱

雜行 唐十二之三 外戚

獨孤懷恩

寶威

從子執

從孫靜誕孝謹維業

長孫順德

從兄敵弟

武士澱

兄士俊士逸孫承嗣三思

楊恭仁

師道執柔

王方翼

子琦 韋玄貞從子溫潯州

劉德威

子審禮延景孫

王仁皎

子守 韋堅 吳湊子士

王難得

子子類

李脩

鄭光

獨孤懷恩元貞皇后從子父熬隋文帝后兄仕至涿郡太守懷

恩自幼養於宮中長學書記家鉅富性貪鄙喜交豕豨博徒為

鄆縣令以疾免高祖平京師轉長安令辦職嚴明受禪擢工部

尚書命代虞州刺史韋義節討蒲州堯君素寡於籌畧數戰敗  
士心沮喪帝嘗戲語卿姑子悉有天下次當及舅子遂懷異志  
咤曰我家渠獨女子賁耶因與主簿元君寶解令榮靜謀刺河  
東以啗劉武周引王行本軍與之連和長驅三輔使虞鄉南山  
羣盜取永豐倉絕秦王餉道會君素死行本得其兵部查已定  
未行遇夏人呂崇茂殺縣令以應武周帝敕懷恩與永安王孝  
基陝州總管于筠內史侍郎唐儉攻崇茂武周使宋金剛潛兵  
來襲皆爲所執君寶與劉世讓私悔懷恩不早舉大事以及斯  
辱故謀寢露及秦王敗武周於美良川懷恩逃歸帝復命率師  
攻蒲遇行本舉州降勅兵據之君寶聞之喜曰王者果不死唐  
儉知狀遇武周求罷兵世讓等還因令白發姦謀帝方濟河聞  
之亟召懷恩窮索黨與縊死于獄以首徇華陰市籍入其家

竇威字文蔚太穆皇后從兄家世貴威自漢至元魏有三皇后與李氏祖在周同爲八柱國父熾入隋任太傅昆弟並向武藝威獨耽文史旣長沈建<sub>有</sub>器局貫覽羣籍舉秀異授祕書郎守職十餘年其學益博蜀王秀辟爲記室復多不法謝去秀廢保全其名大業中累遷內史舍人考功郎中數諫忤旨免官高祖入關召補大丞相府司錄叅軍時方草創百凡未就威多識舊章一時朝儀皆所詳定禪代文詔多叅預焉帝以今叔孫通許之武德元年授內史令每論政事得失從容引義陳古爲論帝益親重嘗引入卧內造膝而語威務自兢懼不爲矜伐有疾帝臨問卒哭之慟贈同州刺史追封延安郡公諡曰靜生平性儉素不徇產業比喪家無餘貲遺令薄塋詔皇太子百官臨送有文集十卷子憚嗣官至岐州刺史 兄子軌字士則父恭周雍

州牧封鄴國公。執性剛果，有威斷。大業中，任資陽郡東曹掾。罷歸，義兵起，聚衆千餘，迎謁長春宮祖大悅，賜良馬十匹，使略地。渭南下，永豐倉，收兵五千，從平京師。封贊皇縣公，爲大丞相府諮議參軍。與北部賊戰，黃欽山賊乘高縱火，我師却，執斬部將十四人，拔其次以代。身擁數百騎殿後，斬督不盡力者。士爭奮，遂大破賊，斬首千級，獲男女二萬。擢太子詹事。武德元年，赤排羌作亂，與薛舉叛將鍾俱仇寇漢中，拜秦州總管，與賊連戰，皆捷，殲除餘黨。復鄴國，舊封遷益州道行臺左僕射，能自勤苦，每出師，臨敵身不解甲，有不用命，雖親貴必誅。麾下皆鞭箠流血，威令必行。與扶州刺史蔣善合擊党項，吐谷渾破走之。復以便宜度羌，必復爲忠，剗讖屯田松州，尋令率所部兵從秦王平王世充會蜀土寇，盜結聚，令還明年悉討平之。後入朝，賜坐容儀。

不肅帝怒下獄俄釋之復授益州都督加食邑六百戶貞觀元  
年徵爲右衛大將軍復出都督洛州值亂後人不土著按諸末  
作咸歸于農人吏俾服威信大行卒贈并州都督子奉節尚承  
嘉公主歷左衛將軍秦州都督 執弟琮有武幹犯法亡命依  
高祖於太原與秦王有宿憾王方收攬衆英降禮接之引入卧  
內每出必俱琮意始安初任大將軍府統軍從平西河破霍邑  
授金紫光祿大夫封扶風郡公又獲屈突迥下陝縣拔太原倉  
有功遷左領軍大將軍賜物五百段俄坐附河陽都尉弼孤武  
謀歸款令出兵往迎負期見殺除名武德初復爲右屯衛大將  
軍時將圍洛陽詔留守陝護饗道使人說降王世充將羅士信  
東都平檢校晉州總管從隱太子平劉黑闥進封燕國公賜黃  
金五十斤卒贈左衛大將軍諡曰敬永徵五年加贈特進 威

從兄子抗字道生父榮定隋洛州總管封陳國公諡曰懿母隋文帝姊安成公主抗美容儀性過率涉知國史山太學校千牛備身儀同三司襲父爵轉梁州刺史天性至孝侍父疾五旬不解帶居喪哀癯過常母卒號絕詔爲節哭歲餘起爲岐州刺史轉幽州總管所至以寬惠聞與高祖少相狎時李氏名在圖籙會楊玄感反特以爲前事發縱若李氏殆天所啓大業末抗巡靈武聞京師已定大喜來歸高祖見之喜握手道其舊言痛飲爲樂授將作大匠武德初兼納言轉左武侯大將軍帝每呼以兄聽朝時引升御坐退人卧內從容談笑武留宿禁省侍燕豫後從秦王平薛舉功第一又從征王世充平東都與軌皆冊勳於廟朝廷榮之賜以女樂一部珍幣不費卒贈司徒諡曰密子衍靜誕衍襲爵至左武衛將軍 靜字元休隋親衛佐武德初

擢并州長史突厥數爲邊患軍糧不繼表請屯田以省俛愆歲  
收粟數十萬斛進檢校并州大總管又請斷石嶺置鄆塞以制  
突厥之入皆從之太宗卽位徵拜司農卿封信都縣男時少卿  
趙元楷務聚歛明正其罪大言如煬帝奢侈竭四海自奉則司  
農須公。今天子躬節儉。屈一人安兆庶。惡用公哉。元楷大慙。改  
夏州都督。諱知突厥。搆珠由中虛實。悉爲諸將陳之。大見克獲。  
潛令人間。郁射設部落鬱孤尼等九俟斤。皆內附。帝嘉之。賜以  
羊馬。有詔。禽頡利處其衆河南。靜上書欲因其破亡。假以賢王  
之號。妻以宗室之女。披其土地。永保邊塞。此實長轡遠馭之道。  
時雖不從。識者避之。終民部尚書。諡曰肅子遠。龔尚遂安公主。  
季子誕。隋朝請郎義寧初。辟丞相府祭酒。轉殿中監。封安豐  
郡公。尚襄陽公主。又爲秦王元帥。府行軍司馬。同征薛舉。遷刑

部尚書轉太常卿高祖諸子荆王元景等皆幼未出宮悉令誕  
主國司家產之事出爲梁州都督以觀初授右領軍大將軍進  
幸國公歷宗正大理二卿殿中監以疾罷終光祿大夫贈工部  
尚書荊州刺史諡曰安長子孝慈嗣至左衛將軍 少子孝謹  
則天時歷太常少卿涇州刺史女卽玄宗母昭成順聖皇后長  
壽二年酷吏誣后母龐氏與后咒詛不道貶孝謹州司馬而卒  
子希城希球希瓏並流嶺南神龍初隨例雪免景雲中追贈孝  
謹太尉邠國公玄宗卽位以早失太后尤重外家加贈太保諸  
舅皆食實封甚見優寵希城遷太子少傅襲父爵希球太子賓  
客封冀國公卒諡曰靖希瓏初封畢國公後改名瓌爲左散騎  
常侍開府儀同三司子鏐復尚永昌長公主兄弟皆貪鄙瓌又  
甚之卒贈司徒 從父弟維鑿獨好學清儉自守以撰著爲業

不與宗族同好所交名士張說盧藏用裴子餘撰吉凶禮要三十卷終水部郎中詹事司直竇氏自武德至今再爲外戚一品三人三品已上三十餘人男八人尚主女六人爲王妃唐世貴盛莫與爲比抗弟璉字之推大業末爲扶風太守以郡歸唐歷禮戶二部尚書從平薛仁果賜錦袍授益州行臺左僕射討平盜賊與皇甫無逸不協免官未幾復祕書監封鄧國公貞觀初遷將作大匠監修洛陽宮鑿池起山務極奢侈太宗怒詔毀之免其官女復爲鄧王妃加右光祿大夫卒贈禮部尚書諡曰安爲人性沉厚工書有巧思識音律命與祖孝孫同定雅樂討論故實撰正聲調一卷威從孫德明祖照尚周文帝義陽公主封鉅鹿郡公父彥襲爵終隋西平太守德明少知文史師事陳留王孝逸年十八募士五千屯黎州號令嚴整遇漢王諒反

遣將恭良未攻倍道擊破之以功擢齊王府屬起兵時誕及宗室孝基神符道宗趙慈景等並繫獄隋將衛文昇陰世師將殺之賴德明力諫乃止武德初拜考功郎中從擊王世充封顯武縣男貞觀初歷常愛二州刺史卒爲人長者口不言功弟德立始爲丞相府千牛高宗時自殿中少監擢爲御史大夫歲中遷司元太常伯諱德初進左相勳職約已上嘗臨朝咨其清素加以賜資居位數年爲封禪大禮使禮成進爵鉅鹿縣男弟德遠樂安男爲人寡學術迎時取合未嘗有過亦無他補益卒年六十九贈光祿大夫幽州都督諡曰恭子懷貞少有名譽性激詭折節自修衣服與馬儉素不與宗昆同聖曆中爲清河令治有能名歷越州都督揚州長史所在以清幹著稱神龍二年遷御史大夫檢校雍州長史時韋后并安樂公主權盛改名從

一以避后父之諱更娶后微時乳母王氏之婢封莒國夫人俗稱乳母壻爲阿奢亦自稱皇后阿奢時人呼以國奢應之不慚自此聲名益損尤敬畏宦官每見無鬚者輒誤接之監察御史魏傳弓劾內侍輔信義縱暴從一固止之不聽后敗斬妻首以獻左遷濠州司馬尋擢益州長史復附太平公主拜侍中爲尚書左僕射監修國史賜爵魏國公贊劍金仙玉真二觀躬自監役族弟維縷譏曰兄位極台袞當思獻可替否以輔明主奈何校址无木厠跡工匠之間欲令海內何所嚮仰從一不能對後逆謀事洩投水而死追戮其屍改姓奔氏子兢字思慎明經擢第調英王府參軍遷尚乘直長轉郿縣令修郵舍道路設冠婚喪紀百姓德之傳号鉅鹿人忠塞士也終司農丞

長孫頌德文德皇后族叔祖澄周秦州刺史父愷隋開府儀同

三司順德任右勳衛避遼東役逃匿太原高祖太宗咸親信之  
以討賊爲名與劉弘基等募兵旬月之間衆至萬餘結營郊外  
義兵起拜爲統軍每戰摧鋒先登從平霍邑破臨汾下絳郡畧  
定陝縣俱有功又與劉文静敗屈突通於潼關通奔洛陽追及  
於桃林執歸京師佐高祖卽位拜左驍衛大將軍封薛國公建  
成之難餘黨屯玄武門擊敗之太宗踐祚真食千二百戶賜以  
官女令宿內省爲人素多放縱不遵法度嘗因監奴受餽帝惜  
其功不忍加罪復賜絹以媿其心尋坐交通反者李孝常除名  
歲餘復拜澤州刺史還以爵邑自此折節從政號令明肅稱爲  
良牧奪前刺史張仕貴趙士達占田數十頃分給貧戶尋又坐  
事免發疾而卒罷朝遣使弔贈荊州都督諡曰襄貞觀十三年  
改封邳國公永徽五年重贈開府儀同三司從兄敬字休明

爲隋庫直時煬帝爲晉王從吹驪山諫王凌危逐鹿王遂止卽  
位擢爲左衛郎將頗見識拔幸江都留守禁獲義旗入關宰子  
弟謁于新豐從平京城授將作少監出爲杞州刺史坐賊免貞  
觀初拜宗正少卿致仕加金紫光祿大夫封平原郡公卒贈幽  
州都督諡曰良陪葬昭陵 從弟操字元節父覽爲周大司徒  
封薛國公操有學術辟高祖相國府金曹參軍未幾檢校虞州  
刺史征秦王征討與聞祕謀徙陝州城中無井爲醜河溜入城  
百姓利安以母喪解長老守闕頌德服除封樂壽縣男歷齊揚  
益三州刺史課皆最下詔褒揚永徽初復轉陝州卒贈吏部尚  
書諡曰安葬給鼓吹至虞方罷 子詮尚新城公主姊乃韓瑗  
妻無忌得罪詮流嶺州其甥趙持滿爲涼州長史仁厚下士且  
工書善騎射力能搏虎走及奔馬邊人畏伏京師無貴賤咸愛

募之許敬宗懼持滿仇已追至京併與詮皆殺之

武士護字信并州文水人則天皇后之父世殖財貨好交結高祖爲唐公屯汾晉休止其家嘗夢負以升天及守太原引爲行軍司鏡見盜賊蜂起進兵書及符瑞陰勸舉兵苔以深識雅意戒勿多言事成當同富貴耳及將起事遣劉弘基長孫順德等分統募兵王威高君雅陰語士護二人皆征三衛所犯當死安得領兵欲繫覈之士護言此並唐公之客若爾便大紛紜威等遂不敢發同僚田德平亦欲勸問募兵之狀士護又勸止之及建大將軍府拜爲鏡曹叅軍從平京城有功擢光祿大夫封太原郡公武德中累遷工部尚書進應國公歷利荆二州都督卒贈禮部尚書諡曰定顯慶元年累贈司徒改封周國公咸亨中又贈太尉太原郡王配享高祖廟庭列功臣上后臨朝尊爲忠

孝太皇建崇先府置官屬追王五世后革命更於東都立武氏  
七廟追冊爲帝妣皆隨帝號曰皇后先天中始削僞號仍爲太  
原王府廢始士護娶相里氏生子元慶元爽繼娶楊氏生三女  
長姝賀蘭越石早寡季嫁郭孝慎不顯及后立楊封代國夫人  
食魏千戶姊榮國妹韓國皆夫人元慶宗正少卿元爽少府少  
監從兄惟良衛尉少卿懷運淄州刺史楊氏問元慶等比疇昔  
事何如對以憂而不樂楊怒諷后僞爲退讓出之于外以示不  
私元慶坐斥龍州元爽濠州惟良始州皆刺史元慶至州憂死  
韓國獨出入禁中一女國妹帝尤愛幸封魏國夫人欲以備嬪  
職后恐其害寵欲殺之會封泰山惟良等來集后毒魏國暴死  
歸罪惟良并元爽懷運皆緣坐家屬投嶺外改姓曷氏絕屬籍  
復取賀蘭斂之爲士護後賜姓武氏擢左侍極蘭臺太史令與

名儒李嗣真等參典刊撰爲人韶秀自喜烝於榮國挾愛佻橫  
多過失榮國卒匿后所出建寺資財又強私故太子妃司衛少  
卿楊思儉女楊喪未畢褻衰麻奏音樂太平公主往來外家官  
人從者悉逼亂之后積怒罪流雷州復故姓自經而死乃還元  
爽之子承嗣奉士獲後楊氏後徙鄴衛二國夫人卒追封魯國  
夫人諡忠烈詔文武近親命婦悉赴弔俄進爲妃以王禮葬咸  
陽給班劔葆仗鼓吹士獲長兄士稜字彥威少柔愿力田官  
司農少卿封宣城縣公常主死圍農稼事卒贈潭州都督陪葬  
獻陵次兄士逸字述有戰功爲齊王府戶曹參軍封六安縣  
公從王守太原爲劉武周所執嘗遣間人陳破賊計及平授益  
州行臺左丞數言當世得失高祖嘉納之終韶州刺史承嗣  
由尚輦奉御襲周國公遷祕書監禮部尚書太常卿同中書門

下三品未幾辭位垂拱初改春官尚書同鳳閣鸞臺平章事兼  
納言至文昌左相首起邪謀革命傳國及已勸后殺唐子孫誅  
大臣不附者倡議迫王先世立宗廟迫封元慶梁王諡曰憲元  
爽魏王諡曰德從沮士讓楚王諡曰僖士逸對王諡曰節自封  
魏王實邑千戶監修國史兄陳業陳王子延邠嗣陳王元慶子  
三思梁王孫崇訓高陽王士讓孫攸寧建昌王攸歸九江王攸  
望會稽王嗣宗臨川王仁範河間王仁範子載德潁川王惟良  
子攸宜建安王攸緒安平王從子攸止恒安王重規高平王崇  
烈新安王延祥延安王又密諭后黨開門舍人張嘉福使洛州  
人上書請立已爲太子以觀后意后問岑長倩格輔元皆執不  
可承嗣恣以罪誅之后不得已罷爲特進貴論嘉福等然不之  
罪未幾復同鳳閣鸞臺三品后決意選太子遷太子太保不得

志鞅鞅憤死贈太尉并州牧諡曰宣 子延基初封南陽王后  
嫌其名更曰繼襲父爵長安初坐與妻永泰郡主及邵王私議  
張易之語聞后怒賜自盡代以弟延義中宗復位敬暉等奏事  
無兩大宜免武氏諸王而帝柔昏不斷素畏太后欲悅安之更  
言諸武皆預誅二張功纔降一級三思德靜郡王懿宗耿國攸  
寧江國攸望葉國嗣宗管國攸宜息國重規邵國延襄魏國攸  
緒巢國崇訓鄆國延祿咸安郡皆爲公宋務光蘇安恒皆又言  
帝終不悟載德終湖州刺史諡武 攸歸歷司馬少卿至齊州  
刺史事母孝姊亡甚喪不嘗五辛語輒流涕攸止絳州刺史三  
人先死不及削封攸望爲太府卿攸宜歷同州刺史萬歲通天  
初爲清邊道行軍大總管討契丹后親餞白馬寺師還無功拜  
左羽林大將軍景龍時遷右羽林軍總禁兵前後十年嗣宗終

司農卿重規歷汴鄭廬三州刺史突厥叛拜天兵中道大總管  
兵分東西三道進擊還爲左金吾衛大將軍終衛尉卿 攸寧  
天授中擢納言踰年改左羽林衛大將軍聖曆初同鳳閣鸞臺  
平章事置勾使苛取民貲毀疾者十七八築大庫聚所得財一  
夕大火不遺一錢以冬官尚書罷神龍初終岐州刺史贈尚書  
右僕射 三思始爲右衛將軍太后時累進夏春二官尚書監  
修國史契丹陷營州命爲榆關道安撫大使還同鳳閣鸞臺三  
品聖曆初檢校內史罷爲太子少保遷賓客專肆傾詖善迎諧  
后意鈞探隱微大獲信任數幸其第賞賜不可算尤屈事后所  
幸臣常爲薛懷義執轡言張昌宗乃王子晉後身引公卿歌咏  
淫汙忝覲不以爲耻后春秋尚厭居官中欲因此市權營建嵩  
山三陽宮萬壽山與秦宮請太后臨幸已與二張扈侍私竊威

福工役鉅萬萬百姓愁歎神龍初同中書門下三品進位司空  
加實戶五百又進開府儀同三司太后崩遺詔盡還減級桓彥  
範等緩於幾事不能加誅以致得私韋后又與上官昭容亂潛  
引入宮反易國政逐罷五王悉還所斥去者復循太后之法建  
言大帝封泰山天后建明堂封嵩山美不可廢帝是之更五縣  
名曰乾封合宮永昌登封告成如二聖故事明年春旱遣禱乾  
陵而雨帝悅因復崇恩廟吳順二陵皆置令丞與宗楚客秦客  
紀處訥崔湜并鴻臚卿甘元東廼相驅煽干黜時政又有周利  
用冉祖雍宋之憑姚紹之并太僕丞李悅時號五狗而趙履溫  
崔日用鄭愔及長安令馬構監察御史李愬託其權勢熏炙內  
外天下爲之語曰崔冉鄭亂時政以爵賞自相崇樹凡構大獄  
汗點善良破壞其宗天下蕩然復大起毬場於上苑中詔文武

分朋爲賭帝與皇后臨觀其用功不啻人頰苦之又與安樂公  
主謀廢節愍太子太子懼發羽林兵圍三思第非斬三思及其  
黨十餘人始韋月將高軫上疏極言其惡月將被殺軫貶惡地  
宋璟亦執奏見斥及是人言其姦亂比司馬懿其忌阻正人逼  
之府宗立斷棺槨尸毀其墓攸望貶死春州詔武誅徙皆盡  
楊恭仁本名綸弘農華陰人附同姓叔父達卽武后母之父父  
雄位司空封觀王恭仁仁壽中爲甘州刺史臨事不苟細邊徼  
又安詔褒美大業初轉吏部侍郎素持正道爲蘇威等所忌俄  
以討獲楊玄感功煬帝召見諭以向但知卿奉法而乃勇決如  
此遣使捕盜川爲河南通大使至熊郡爲朱粲所敗奔江都化  
及之弒畧吏部尚書使守魏縣元寶歲執送京高祖素知名授  
黃門侍郎封觀國公尋爲涼州總管悉心綏慰習知種落情僞

田葱嶺以東皆奉貢贄就加納言遇突厥頡利率衆獵境上應  
機設拒張疑兵建虛幟以示勇顛利懼而走賀拔行威之叛乘  
其不意募矯勇倍道而進遂克二城縱所俘還衆感悅共縛行  
威以降名拜吏部尚書兼中書令仍督涼州諸軍事遷左衛大  
將軍武德末歷雍州牧揚州大都督府長史太宗卽位以洛陽  
要重遷爲洛州都督病乞骸加特進卒贈潭州都督陪葬昭陵  
諡曰孝爲人性冲厚以禮自閑居貴勢舉望益重未嘗凌忤于  
物時人方漢石慶子思訓襲爵顯慶中爲右屯衛將軍從幸  
并州以拒右衛大將軍慕容寶節謀亂爲所毒死妻訴復其寃  
孫睿交尚長寧公主豫誅張易之賜實封五百戶神龍中爲祕  
書監貶絳州別駕弟師道字景猷清敏有才客洛陽爲王世  
充所拘聞歸高祖授上儀同左右備身尚桂陽公主除吏部侍

郎改太常卿封安德郡公貞觀十年拜侍中參預朝政親赴隆  
渥自處謹密未嘗語禁省事太宗數訪羣臣才行間有所推久  
之遷中書令命治太子承乾獄以公主前子趙節預謀欲活之  
帝怒罷爲吏部尚書本起貴冑素乏甄品四海人物非所練悉  
及是專抑貴勢親黨以遠嫌疑用人多違其才時寡稱許從征  
高麗復攝中書令遷改工部尚書卒贈并州都督諡曰懿陪葬  
昭陵爲人資性純淑無大過失遇事怯懦緩急不得其力人以  
比漢之孔光然善草隸工詩與名士燕集捉筆如宿構者遇宴  
賜亦令爲之少選輒成無所竄易一坐嗟伏子豫之娶巢王元  
吉女壽春縣主從弟執柔達子歷地官尚書武后臨朝欲武  
氏并外家一人嘗爲宰相乃拜執柔同中書門下三品未幾卒  
子活開元中官至吏部侍郎同州刺史弟執一同誅二張有功

封河東郡公累官右金吾大將軍楊氏自恭仁後名位益盛凡三人尚主五女爲王妃一贈皇后官三品以上二十餘人

王方翼字仲翔高宗后從祖父祖裕尚高祖妹同安公主至隋州刺史開府儀同三司卒諡曰文父仁表貞觀中爲岐州刺史早卒方翼數歲哀哀如成人時號孝童主性剛戾母李氏爲所斥自幼別居鳳泉里雜庸保執苦墾田植樹於林坂完船屋燎松丸墨遂爲富家永徽中主進大長公主薨年八十六方翼始還京師擢右千牛調安定令誅滅大姓姦蒙脅息徙瀚海都護司馬坐事下遷朔州尚德府果毅歲餘代還居母喪過於哀毀造醫療視起復肅州刺史州無墜墜發卒建樓堞環多藥水烽邏精明儀鳳間河西蝗獨不至境益出私錢作水碓以濟饑瘵他郡來奔者構舍數十百楹居之全活甚衆副裴行儉討遮旬

命兼安西都護築碎葉城面三門紆還以詭出入五旬畢西域人縱觀莫測其方略悉獻珍貨未幾徙庭州刺史永淳初十姓阿史那叛圍弓月城方翼引軍戰伊麗河敗之斬首千級俄而三姓咽麴兵十萬踵至進戰熱海矢若箝引佩刀斷去謀知所部雜南謀執方翼爲內應陽爲召會厚賜而出潛令縛之殺千人卽遣騎分道襲咽麴等皆驚潰遁去令首領突騎施等三百人西戎震服以功遷夏州都督明年召議西域事宜引見奉天宮備詢熱海苦戰狀視其創咨嗟久之賜資良厚又與程務挺同平白鐵余飛槍擊賊火其柁封太原郡公阿史那元珍入寇復詔進擊時庫無完鎧乃斷板盡虎文鉤聯解合馬見奔駭遂敗獲二大將因降桑乾舍利二部及后被廢流崖州道卒年六十三神龍初復官爵生平善書與親叔琬齊名篤于友義趙持

滿誅死親戚莫敢視往哭其尸具禮收葬金吾勅繫高宗不加  
罪子珣字伯玉與兄璵弟璿皆以文學稱珣登進士制策二科  
授藍田尉以拔萃轉長安囚后故左遷亳州司法參軍龍初  
爲河南丞武三思矯制貶臨川令宋璟名授侍御史山爲許州  
長史歲旱開廩振民累遷工部侍郎秘書少監右散騎常侍卒  
贈戶部尚書諡曰孝子銅天寶中歷右補闕殿中侍御史

韋玄貞中宗后父初任普州參軍后初冊太子妃擢豫州刺史  
以帝幽房陵流死欽州妻崔氏并四子皆爲容州蠻齊承所殺  
二女逃還京師帝復位贈玄貞太師雍州牧益州大都督追封  
上洛郡王遣使迎其喪還詔后母族廣州都督周仁軌斬承首  
以祭柩至帝后同登長桑宮塋哭加贈鄧王謚文憲廟號褒德  
陵曰榮先置令丞給百戶掃除贈洵吏部尚書汝南郡王浩太

常卿武陵郡主洞衛尉卿淮陽郡王泚太僕卿上蔡郡王並歸  
葬京師長女嫁陸頌爲國子祭酒仲女嫁嗣虢王邕兄玄儼官  
至許州刺史封魯國公特進并州大都督子溫滑兄弟頗以文  
進帝方盛選詞學爲侍從與賦詩相娛樂溫初試吏坐贓斥神  
龍初擢宗正卿禮部尚書襲封景龍三年進太子少保同中書  
門下三品遙領揚州大都督天下大權在手頗自封殖以牢其  
權引用支黨不一公卿雖畏伏拘於庸鄙無能不如諸武臣而  
熾也帝崩后專政畏有變敕溫總內外兵守省中又以從子播  
捷從弟璿及高嵩分領左右羽林統軍溫與宗楚客武延秀等  
說后託圖讖言韋氏當受命謀殺少帝而內憚相王并太平公  
主屬尊欲先除之然後發是夜立宗起兵將軍葛福順攻立武  
門入羽林斬三人梟首以徇軍中相率而應無敢後明旦斬溫

分捕諸韋子弟無少長皆死潛自洛州戶曹參軍兼修文館大學士拜左羽林大將軍封曹國公常在北軍無所造作從后幸溫泉惡熒惑久留羽林乃毒殺潛以塞變贈司徒并州大都督子捷尚成安公主從弟濯尚定安公主嘗毀萬年令李令質於帝召至將罪之爲言有富商犯罪貨請不從帝釋不責仁執萬年人官至左羽林大將軍封汝南郡公後爲并州長史殘酷嗜殺后敗亦誅睿宗毀玄貞等墓至天寶九載詔復開掘長安尉薛榮先往視銘葬與發冢日月正同而陵與尉名亦相合

劉德威彭城人睿宗肅明皇后祖也爲人姿貌魁秀有幹畧大業末從裴仁基討淮賊手劍其首浮青蛙傳首行在後歸李密使守懷州密降俱入朝授左武侯將軍封滕縣公判并州總管府司馬詔將兵擊劉武周齊王元吉棄郡還朝賊遂薄城民皆

叛附賊德威爲敵所獲使徇地涪州自拔來歸盡得賊中虛實  
高祖嘉納改彭城縣公未幾檢校大理少卿從平洛陽有功轉  
刑部侍郎加散騎常侍妻以平壽縣主貞觀初任綿州刺史政  
號廉平百姓立石頌德尋遷益州大都督府長史入爲大理卿  
太宗問比來刑網稍密其咎安在對曰臣之克猛視主之好尚  
律失入者減三失出者減五今坐入者無辜坐出者有罪所以  
吏務深文爲自營計非有教使然也帝然其言後遷刑部尚書  
檢校雍州別駕詔按齊王祐獄還半道聞祐反詔就發河南兵  
經畧之母喪服除歷遂同二州刺史卒于官年七十一贈禮部  
尚書幽州都督諡曰襄陪葬獻陵爲人接物寬平閨門友睦所  
得俸祿以分宗親無留藏子審禮少喪母祖母元氏養之遭  
亂時尚未冠自鄉里負以渡江高祖定天下始西入關元氏每

疾親煮湯藥嘗而後進語以孝通神明吾一顧念輒爲稍輕貞  
觀中歷左驍衛郎將父喪徒跣以赴比葬流血灑地行路咨嘆  
見父執必感泗滂沱事繼母尤孝謹遇小疾憂形于色終夕不  
寐服除當襲爵以讓繼母弟延景有詔不許愛之益篤所得俸  
祿悉以資之已妻并子多執寒苦晏如也再從皆同居合二百  
口人無間言時號孝義劉家遷工部尚書檢校左衛大將軍儀  
鳳三年吐蕃寇涼州命副李敬玄致討與南戰青海上敬玄迴  
撓不前審禮遂敗被執其子尚乘直長殆庶及延景詣闕待罪  
請入爵以贖有詔審禮徇忠而沒非有罪比宜各還職仍命少  
子易從往省旣至而審禮卒易從晝夜號哭不止吐蕃哀其志  
乃得尸還萬里扶護跣行以歸見者流涕贈工部尚書諡曰倍  
延景字冬日終陝州刺史女卽皇后睿宗初追贈尚書右僕

射陪葬乾陵 易從累遷彭城長史封任城縣男在官仁恕永  
昌中爲周典誣構將刑百姓十餘萬奔救不得爭解衣投地願  
爲長史祈福天下聞者莫不寃之 子昇年十餘歲流嶺表及  
長能文善草隸人信愛之六道使誅流人首領庇免易姓爲溫  
北歸洛景雲中特授右武衛騎曹參軍開元中累遷中書舍人  
終太子右庶子 審禮從弟延嗣爲潤州司馬遇徐敬業來攻  
與刺史李思文固守俄而城陷勒降不肯曰吾世蒙恩今所負  
多矣詎能苟生爲宗族羞敬業怒將斬之釋思溫救止繫江都  
獄敬業敗復以裴炎近親不得敘功遷梓州長史終汾州刺史  
宗族至刺史者二十餘人

王仁皎字鳴鶴玄宗廢后父景龍中舉將材授甘泉府果毅遷  
右衛中郎卽位擢將作大匠進累開府儀同三司封祁國公食

戶三百生平避職不事委遠名譽厚奉養積媵妾貲貨而已卒年六十九贈大尉益州大都督謚昭宣帝御望春亭過喪詔張說文其碑帝爲題石其子守一請以昭成后父竇孝謹故事墳高五丈一尺宋璟奏僭禮厚葬前世所譏古墓而不墳棺槨各有度數自韋庶人追王其父擅作鄆陵禍不旋踵臣故欲成朝廷之政中官之美而爲此言帝曰朕每事常欲正身以成紀綱至於妻子情豈有私可其奏 守一與后雙生帝微時雅相舊妻以清陽公主爲尚輦奉御至太僕少卿從討太平公主有功遷殿中少監封晉國公賜封戶五百進太子少保轉太常卿被遇良渥后廢貶柳州別駕至藍田賜死爲人沓墨無顧藉財蓄巨萬皆籍入之

韋堅字子全萬年人父元珪兗州刺史姊惠宣太子妃妹肅宗

王妃一時榮盛仕最蚤由秘書丞爲長安令以幹濟名見宇文融方聚歛得進乃求轉運江淮和賦所在置吏督察以佐國儲歲終增至鉅萬玄宗美其才擢爲陝郡太守水陸轉運使請開漢隋舊渠起閘門抵長安以通山東租賦壅渭水爲典成堰絕瀾漦而東注永豐倉下復與渭合舊時長安城東有望春樓亦鑿其下爲潭凡二年而成豫取汴宋小舟三百貯之潭篙工柁師皆效吳楚服著大笠侈袖苦屐舫舟署某郡陳所產於其上若廣陵錦鏡銅器會稽吳綾絳紗南海瑋瑁象齒豫章菟器茗鑑宣城空青石綠始安蕉葛蜃膽丹陽衫段文繡相街尾進數十里不絕自造曲解名吏唱習立船前倡優齊聲應和鼓吹合作船次樓下帝與羣臣登樓臨觀堅跪獻諸郡貨轉給貲戚近臣仍上百牙盤食教坊音樂迭進惠宣妃亦出寶物供具帝大

悅擢堅左散騎常侍官屬各賞有差給復役人一年賜舟工錢  
二百萬名其潭曰廣運未幾進御史中丞兼江淮租庸轉運處  
置等使封華城縣男李林甫初甚媿之堅妻姜皎之女卽林甫  
舅子也及是惡害其寵授堅刑部尚書奪諸使以楊慎矜代之  
堅失職怨望會河隴節度皇甫惟明數與帝前短毀林甫稱堅  
有才林甫知之乘元夕宴集奏堅外戚與邊將私通且惟明故  
忠王友謀立太子有詔訊鞠使慎矜圖忠王鉞文致其獄帝大  
怒貶堅縉雲惟明播川皆太守再貶江夏別駕長流臨封郡遣  
羅希奭殺之籍其家太子懼表與妃絕堅諸弟將作少匠蘭鄩  
縣令水兵部員外芝子河南戶曹諒皆謫去復遣使鈎捕舟夫  
漕吏林甫死乃止

吳湊章敬太后季弟寶曆二年代宗始封拜母族贈祖神泉司

徒父令珪太尉母季氏秦國夫人叔令瑤太子家令濮陽郡公  
令瑜太子論德濟陽郡公及兄澈階並開府儀同三司湊山布  
衣授太子詹事封濮陽郡公固辭太過改太子賓客充十宅使  
累左金吾衛大將軍爲人小心謹慎智識周敏特承顧問深見  
委信大曆中滑帥令狐彰汴帥田神功相次歿驍兵乘以作梗  
代宗命持節撫慰二鎮委曲開諭務盡下情度朝廷可行者爲  
請皆得軍民和協還對稱旨帝以元載權賄昭彰欲誅未發恐  
左右洩漏密與湊圖其黨與王縉楊炎王昂韓滉包佶等初欲  
從坐湊諫法有首從理不至死若一例極刑恐虧聖德各得從  
宥丁繼母喪服除起爲右衛將軍兼通州刺史貞元初兼御史  
中丞轉福建觀察使爲政勤儉清苦美譽日聞擢爲陝虢觀察  
使以代李翼翼宰相竇參黨也又代劉玄佐爲汴州刺史未至

軍亂還爲京兆尹時遇殺貴人多流亡渙夜夜爲理人樂其政  
時甚苦宮市湊言宮中所需貴臣可辦不必更差中使又言掌  
開廐驥騎飛龍內閣芙蓉諸禁軍并諸司使雜供手力資課太  
繁奏宜減省上多從之掾史初以貴戚恐不諳簿領凡有疑難  
事多候騎從將出白之免指撻瑕病一經閱視立見姦倖下  
筆決斷無毫釐差且能寬待羣吏非有大過不行笞責惟面名  
按問詰實乃釋以是尤加惕厲庶務咸舉上營文敬太子義章  
公主墳湊言召集工役妨廢農業宗屬門吏勸令勿言荅曰主  
上夙哲憂勞四海必不因鍾念而忽疲民但人多順旨不言若  
再三啓諫宸情轉易則生民受賜倘長吏不言窮民論訴罪歸  
何人識者重之進兼兵部尚書有疾不召巫醫惟上所遣醫暫  
爲一服家人泣勉對曰吾以凡才濫歷顯位踰四十年壽登七

十一更欲何求惟朝夕歸全以侍先人足矣卒贈左僕射罷朝  
一日始官道樹榆命易以槐陰甫成而薨人指而思之 子士  
矩文學早就喜與英俊遊故人入助爲談說開成初爲江西觀  
察使以侈用貶蔡州別駕復流端州以死

王難得瑯琊臨沂人憲宗母莊憲皇后祖也父思敬少從軍累  
試太子賓客難得武勇善騎射天寶初爲河源軍使遇吐蕃贊  
普子郎支都特勇乘請真馬寶劍裝鞍出陣求歸無敢與校難  
得挾槍奮馬突前刺之斬其首傳京師軍遊立宗召見令於殿  
前乘馬挾槍作刺郎支都之狀賜以錦袍金帶累金吾將軍從  
哥舒翰擊吐蕃於積石鹵吐谷渾王子悉弄參及子壻悉頰藏  
而還拜左武衛將軍關西遊奕使九載擊吐蕃收五橋拔樹敦  
城補白水軍使十三載從收九曲加特進潼關兵敗從幸靈武

出家貲助軍及獻金銀器至德初試衛尉卿領典平軍使兼鳳翔都知兵馬使進收京城與賊戰因救新元躍墮馬賊射中眉穿皮郭目自拔去箭并皮馳馬復戰血流被面抗賊不已肅宗嘉之又從子儀攻相州封瑯琊郡公至英武軍使卒贈潞州大都督子顏少從父征役累官金紫光祿大夫檢校衛尉卿生后而卒順宗褒贈思敬司徒難得太傅子顏太師顏子重榮官至福王傅用字師柔初授太子賓客至詹事封太原郡公掌鹿苑爲人謙畏無過累檢校左散騎常侍右金吾大將軍卒贈

工部尚書

李脩本起寒賤以莊憲太后姪壻得進歷坊絳二州刺史爲政嚴辦無他才然性纖巧專飾厨傳結納闈寺求善譽憲宗以爲才拜司農卿進京兆尹專聚斂以固恩寵數譖毀近臣一時側

目太后崩詔充橋道置頓使各嗇官費裁損物料梓官至溺橋  
從官多不得食始議更造渭城門計錢三萬脩不聽惟整深軌  
道柱危不支方過喪而門壞輜輳僅免徽門乃得行脩妄奏車  
軸折山陵使李逢吉劾以罔上請免官帝因用兵時脩屢有賂  
獻得不坐纔詔奪廩逢吉持之乃削銀青一階翌日加賜黃金  
拜浙西觀察使欲倚以掎剋遺利撫摺富饒俄被疾還京師卒  
人士相賀

鄭光孝明皇太后弟素微賤會昌末忽夢御大車載日月行中  
衛光輝洪洞照映六合寤而占之曰君且暴貴不閱月宣宗卽  
位遂由民伍拜諸衛將軍俄遷平盧軍節度使徙河中鳳翔賜  
鄆縣雲陽良田千畝大中四年詔除其租賦宰相奏有國常典  
不可因外戚廢法帝悟追格前詔仍不肯輸京尹韋澳械其庄

吏將箕于法太后爲上言澳於延英具奏本末上曰今日納租足放之對曰今日尚在限內明日則不敢奉詔上入奏太后澳不可犯后貸完之俄封其妾爲夫人光曉帝意還詔不敢拜帝嘉之七年來朝名對廷英占奏鄙賤不稱所望留爲右羽林統軍兼太子太保不復任以事太后言其家空乏帝厚賜金緡卒贈司徒罷朝二日羣臣奉慰子漢卿終義昌軍節度使

冊曰唐世外家最闊休戚荷帝寵恩貪天罔極淫心縱欲千古嘆息